

Na osnovu čl. 4.2. tačka (2) i 4.7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju (“Službeni glasnik BiH”, broj 2/05), člana 4. stav (2) tačka d) i člana 16. Pravilnika o licencama – Prečišćeni tekst (“Službeni glasnik BiH”, broj 63/16), rješavajući po zahtjevu pravnog lica “Ekoenergija” d.o.o., Brčko Distrikt Bosne i Hercegovine od 28. marta 2025. godine, koji je dopunjen 16. maja 2025. godine i 27. juna 2025. godine, na sjednici Državne regulatorne komisije za električnu energiju, održanoj 8. oktobra 2025. godine, donijeta je

ODLUKA

O IZDAVANJU PRETHODNE DOZVOLE ZA IZGRADNJU OBJEKTA ZA PROIZVODNJU ELEKTRIČNE ENERGIJE

1. Pravnom licu “Ekoenergija” d.o.o., Brčko Distrikt Bosne i Hercegovine, izdaje se prethodna dozvola za izgradnju objekta za proizvodnju električne energije – fotonaponske elektrane “Donji Rahić - Kladje” na lokaciji urbanog područja Donji Rahić, Brčko Distrikt Bosne i Hercegovine, instalirane snage (DC) 12 143,60 kWp / (AC) 9 800 kW.
2. Prethodna dozvola iz tačke 1. ove Odluke izdaje se na period od 8. oktobra 2025. godine do 7. oktobra 2031. godine i koristi se u skladu s Uvjetima za korištenje prethodne dozvole za izgradnju objekta za proizvodnju električne energije, koji su sastavni dio ove Odluke.
3. Vlasnik prethodne dozvole je u obavezi započeti izgradnju elektrane iz tačke 1. ove Odluke najkasnije u roku od dvije godine. U suprotnom, prethodna dozvola za izgradnju prestaje da važi.
4. Vlasnik prethodne dozvole je u obavezi obavijestiti Državnu regulatornu komisiju za električnu energiju o početku i završetku gradnje, te pribaviti licencu za proizvodnju električne energije prije puštanja u rad elektrane iz tačke 1. ove Odluke.
5. Ova Odluka stupa na snagu danom donošenja, a njen dispozitiv bit će objavljen u “Službenom glasniku BiH”, službenim glasilima entiteta i Brčko Distrikta Bosne i Hercegovine.

Obrazloženje

Pravno lice “Ekoenergija” d.o.o., Brčko Distrikt Bosne i Hercegovine (u daljnjem tekstu: podnosilac zahtjeva), podnijelo je Državnoj regulatornoj komisiji za električnu energiju (u daljnjem tekstu: DERK) zahtjev za izdavanje prethodne dozvole za izgradnju objekta za proizvodnju električne energije (u daljnjem tekstu: prethodna dozvola za izgradnju), zaprimljen pod brojem 05-28-12-152-1/25 od 28. marta 2025. godine, koji je dopunjen 16. maja i 27. juna 2025. godine.

Shodno članu 4.2. tačka (2) alineja e) Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), za izgradnju objekta za proizvodnju električne energije na području Brčko Distrikta Bosne i Hercegovine potrebna je prethodna dozvola za izgradnju, a podnosilac zahtjeva je dužan zadovoljiti uvjete i kriterije za izdavanje prethodne dozvole za izgradnju koje svojim pravilima i propisima odredi DERK.

Zahtjev je podnijen na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije,

razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-152-6/25 od 16. jula 2025. godine.

Po pregledu i provjeri svih formalnih elemenata zahtjeva, DERK je 21. jula 2025. godine objavio u dnevnim novinama i na svojoj internet stranici kratku obavijest za javnost sumirajući zahtjev za izdavanje prethodne dozvole za izgradnju i odredio rok do 29. jula 2025. godine za dostavljanje komentara javnosti na podnijeti zahtjev.

DERK je konstatirao da nisu dostavljeni komentari javnosti u vezi podnijetog zahtjeva za izdavanje prethodne dozvole za izgradnju, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješača.

DERK je izvršio provjeru podataka, dokumenata i informacija priloženih uz zahtjev i utvrdio da isti svjedoče o tehničkim, pravnim i finansijskim mogućnostima podnosioca zahtjeva da ispuni sve kriterije, uvjete i standarde propisane zakonom, te pravilima i propisima DERK-a, za izdavanje prethodne dozvole za izgradnju.

Stoga je pripremljen Nacrt odluke o izdavanju prethodne dozvole za izgradnju, koja se koristi u skladu s Uvjetima za korištenje prethodne dozvole za izgradnju objekta za proizvodnju električne energije. Ovaj dokument je od 5. septembra 2025. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 11. septembra 2025. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici, po aktu DERK-a broj 05-28-12-152-18/25 od 17. septembra 2025. godine kojim mu je dostavljen Prijedlog odluke, uz poziv za dostavu komentara na isti, nije isticao neslaganje s bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed navedenog, DERK je odlučio kao u dispozitivu ove Odluke.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-152-20/25

8. oktobra 2025. godine

Tuzla

Predsjedavajući Komisije

Suad Zeljković